

Na osnovu člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), člana 3. i člana 15. stav (3) Zakona o općoj sigurnosti proizvoda ("Službeni glasnik BiH", broj 102/09), a u vezi sa članom 14. tač. b) i c) Zakona o nadzoru nad tržištem u Bosni i Hercegovini ("Službeni glasnik BiH", br. 45/04, 44/07 i 102/09), Vijeće ministara Bosne i Hercegovine, na prijedlog Agencije za nadzor nad tržištem BiH, na 49. sjednici održanoj 21.03.2016. godine, donijelo je

## ODLUKU

### O STAVLJANJU NA TRŽIŠTE UPALJAČA SIGURNIH ZA DJECU

#### Član 1.

(Predmet)

Ovom Odlukom se propisuju sigurnosni zahtjevi za stavljanje na tržište ili činjenje dostupnim na tržištu Bosne i Hercegovine upaljača sigurnih za djecu, zabrana stavljanja na tržište upaljača privlačnih djeci, te obaveze proizvođača i distributera u svrhu primjene ove Odluke.

#### Član 2.

(Definicije)

Pojmovi koji se upotrebljavaju u ovoj Odluci imaju sljedeće značenje:

- a) "upaljač" je ručni uređaj koji koristi gorivo za proizvodnju plamena, bez obzira da li se može ponovo napuniti ili ne, pri čemu je dovod goriva sastavni dio uređaja. Namijenjen je prvenstveno za paljenje cigareta, cigara i lula, a može se upotrijebiti i za paljenje drugih materijala kao što su papir, fitilji, svijeće i svjetiljke;
- b) "upaljač privlačan djeci" je svaki upaljač i držač za upaljač, definisan u specifikaciji 3.2 standarda BAS EN 13869, uključujući, između ostalih, upaljače u obliku likova iz crtanih filmova, igračkaka, oružja, satova, telefona, muzičkih instrumenata, vozila, ljudskog tijela ili dijelova ljudskog tijela, životinja, hrane ili pića, i upaljače koji imaju pokretne dijelove, akustične, svjetlosne ili druge zabavne efekte;
- c) "upaljač siguran za djecu" je upaljač dizajniran i proizveden na takav način da ga, pod uobičajenim i razumno predvidljivim uslovima upotrebe, ne mogu upotrijebiti djeca mlađa od 51 mjeseca (4 godine i 3 mjeseca), usljed neke od sljedećih karakteristika: dizajna upaljača, postojanja zaštite na mehanizmu za paljenje, sile potrebne za aktiviranje upaljača ili složenosti i redoslijeda radnji potrebnih za aktiviranje upaljača;
- d) "model upaljača" su upaljači istog proizvođača koji se ne razlikuju po dizajnu ili drugim karakteristikama na bilo koji način koji može uticati na sigurnost djece;
- e) "ispitivanje sigurnosti za djecu" je sistematično ispitivanje određenog modela upaljača u pogledu sigurnosti za djecu, na uzorku dotičnog upaljača, posebno ispitivanja izvršena u skladu sa BAS EN 13869 u pogledu specifikacija, osim onih iz tačaka 3.1, 3.4 i 5.2.3 ovog standarda, ili u skladu sa ispitnim zahtjevima odgovarajućih propisa zemlje u kojoj je upaljač proizveden, a u kojima su na snazi

zahtjevi za upaljače sigurne za djecu jednaki zahtjevima koje propisuje ova Odluka;

- f) "proizvođač" ima značenje kako je definisano u članu 2. e) Zakona o općoj sigurnosti proizvoda;
- g) "distributer" ima značenje kako je definisano u članu 2. f) Zakona o općoj sigurnosti proizvoda;
- h) "stavljanje na tržište" je prvo činjenje proizvoda dostupnim na tržištu Bosne i Hercegovine;
- i) "činjenje dostupnim na tržištu" je isporuka proizvoda za distribuciju, potrošnju ili upotrebu na tržištu Bosne i Hercegovine u okviru trgovačke djelatnosti, uz plaćanje ili besplatno.

#### Član 3.

(Zahtjevi za stavljanje na tržište)

- (1) Uvoznici, proizvođači i distributeri ili njihovi ovlašteni predstavnici su obavezni da stavljaju na tržište i čine dostupnim na tržištu Bosne i Hercegovine samo upaljače sigurne za djecu.
- (2) U smislu člana 2. tačke c) ove Odluke, sljedeći upaljači se smatraju sigurnim za djecu:
  - a) upaljači koji su u skladu sa standardom BAS EN 13869 u pogledu specifikacija, osim onih iz tačaka 3.1, 3.4 i 5.2.3 ovog standarda;
  - b) upaljači koji su u skladu sa odgovarajućim propisima zemlje u kojoj su proizvedeni, a u kojoj su na snazi zahtjevi za upaljače sigurne za djecu jednaki zahtjevima koje propisuje ova Odluka.
- (3) Uvoznicima, proizvođačima i distributerima ili njihovim ovlaštenim predstavnicima zabranjeno je stavljanje na tržište Bosne i Hercegovine upaljača privlačnih djeci.
- (4) Zabrana iz stava (3) ovog člana se ne primjenjuje na upaljače privlačne djeci namijenjene za izvoz u treće zemlje.

#### Član 4.

(Izuzeci od primjene)

- (1) Ova Odluka se ne odnosi na upaljače iz člana 2. tačke a) ove Odluke koji se mogu ponovo puniti i za koje proizvođač, na zahtjev organa iz sistema nadzora nad tržištem definisanih članom 6. Zakona o nadzoru nad tržištem u Bosni i Hercegovini, dostavi svu neophodnu dokumentaciju kojom potvrđuje da su upaljači dizajnirani, proizvedeni i stavljeni na tržište tako da, za vrijeme roka trajanja od najmanje pet godina, osiguravaju stalnu očekivanu sigurnu upotrebu, predmet su popravke i posebno ispunjavaju sve sljedeće zahtjeve:
  - a) imaju pisanu garanciju proizvođača na period od najmanje dvije godine za svaki upaljač, u skladu sa važećim zakonima koji regulišu obligacione odnose;
  - b) postoji praktična mogućnost da se poprave i ponovno sigurno napune tokom njihovog životnog vijeka, a prije svega moraju imati mogućnost popravke mehanizma paljenja;
  - c) dijelovi koji nisu potrošni, a kod kojih postoji vjerovatnoća da se, po isteku garancije, pri učestaloj upotrebi istroše ili pokvare, mogu zamijeniti ili popraviti kod ovlaštene ili specijalizirane službe održavanja sa sjedištem u Bosni i Hercegovini.
- (2) Stav (1) ovog člana se ne odnosi na upaljače privlačne djeci.

#### Član 5.

(Obaveze proizvođača i distributera)

- (1) Od dana primjene ove Odluke, proizvođači, kao uslov za stavljanje upaljača na tržište su dužni da:
  - a) čuvaju i na zahtjev organa iz sistema nadzora nad tržištem, bez odlaganja, dostave izvještaj o ispitivanju upaljača u pogledu sigurnosti za djecu za svaki model upaljača sa uzorkom upaljača ispitivanog modela, kojim se potvrđuje da je model upaljača, koji je stavljen na tržište, siguran za djecu;
  - b) potvrde, na zahtjev organa iz sistema nadzora nad tržištem, da su svi upaljači iz svake serije, koja je stavljena na tržište, u skladu sa ispitanim modelom, te da na zahtjev organa iz sistema nadzora, dostave dokumentaciju o ispitnim i kontrolnim programima, koji podupiru tu potvrdu;
  - c) kontinuirano prate usklađenost upaljača, koji su proizvedeni sa tehničkim rješenjima usvojenim sa ciljem osiguranja sigurnosti za djecu, korištenjem odgovarajućih metoda ispitivanja, kao i da čuvaju na raspolaganju evidenciju o proizvodnji, koju organi iz sistema nadzora nad tržištem, mogu zahtijevati, kojom se pokazuje da su svi upaljači proizvedeni u skladu sa ispitanim modelom;
  - d) čuvaju i, na zahtjev organa iz sistema nadzora nad tržištem, bez odlaganja, dostave novi izvještaj o ispitivanju upaljača u pogledu sigurnosti za djecu ukoliko su izvršene bilo koje izmjene na modelu upaljača koje mogu nepovoljno uticati na karakteristike modela da ispuni zahtjeve ove Odluke.
- (2) Od dana primjene ove Odluke, distributeri su dužni da čuvaju i da na zahtjev organa iz sistema nadzora, bez odlaganja, dostave dokumentaciju neophodnu za identifikaciju svakog subjekta koji im je isporučio upaljače koje su oni stavili na tržište, sa ciljem da se osigura sljedivost do proizvođača upaljača kroz lanac isporuke.
- (3) Upaljači za koje proizvođači i distributeri, u roku koji odredi organ iz sistema nadzora nad tržištem, ne pruže dokumentaciju iz st. (1) i (2) ovog člana, se povlače sa tržišta.

#### Član 6.

(Izvještaji o ispitivanju upaljača u pogledu sigurnosti za djecu)

- (1) Izvještaji o ispitivanju upaljača u pogledu sigurnosti za djecu iz člana 5. ove Odluke moraju sadržavati sljedeće:
  - a) naziv, adresu i glavno mjesto poslovanja proizvođača i uvoznika ukoliko su upaljači uvezeni;
  - b) potpun opis upaljača, uključujući veličinu, oblik, težinu, gorivo, količinu goriva, mehanizam paljenja i sigurnosne mehanizme za djecu, dizajn, tehnička rješenja i druge karakteristike koje čine upaljač sigurnim za djecu u skladu sa definicijama i zahtjevima ove Odluke. Ovo će posebno uključivati detaljan opis svih dimenzija, zahtjeve za silu ili druge karakteristike koje mogu uticati na sigurnost za djecu, uključujući proizvođačevo odstupanje za svaku takvu karakteristiku;
  - c) detaljan opis ispitivanja i dobijenih rezultata, datume ispitivanja, mjesto gdje su se ispitivanja izvršila, identitet organizacije koja je izvršila ispitivanja i detalji kvalifikacija i nadležnosti takve organizacije da izvrši ispitivanja;
  - d) identifikaciju mjesta gdje se upaljači proizvode ili se se proizvodili;

- e) mjesto gdje se čuva dokumentacija koja se zahtijeva po ovoj Odluci;
  - f) certifikate o akreditaciji ili priznavanju ispitnog tijela.
- (2) Izvještaje o ispitivanju upaljača u pogledu sigurnosti za djecu iz člana 5. ove Odluke izdaju:
    - a) Akreditirana ispitna tijela koja ispunjavaju zahtjeve određene u BAS EN ISO/IEC 17025 "Opći zahtjevi za osposobljenost ispitnih i kalibracionih laboratorija", te koja su akreditirana od strane člana Međunarodne organizacije za akreditiranje laboratorija (ILAC) ili Instituta za akreditiranje Bosne i Hercegovine (BATA) za vršenje ispitivanja upaljača u pogledu sigurnosti za djecu ili ispitna tijela koja su na drugi način priznata u Bosni i Hercegovini za tu namjenu; ili
    - b) Ispitna tijela čiji su izvještaji o ispitivanju upaljača u pogledu sigurnosti za djecu prihvaćeni u zemlji u kojoj se primjenjuju zahtjevi za sigurnost djece jednaki zahtjevima koje propisuje ova Odluka.

#### Član 7.

(Smjernice za provedbu ove Odluke)

Za potrebe provedbe i praktične primjene ove Odluke, Agencija za nadzor nad tržištem Bosne i Hercegovine će u roku od 3 mjeseca donijeti Smjernice koje će biti dostupne na internet stranici [www.annt.gov.ba](http://www.annt.gov.ba).

#### Član 8.

(Preduzimanje mjera)

- (1) Za praćenje poštivanja obaveza iz člana 3. ove Odluke, nadležni su organi iz sistema nadzora nad tržištem.
- (2) Prema proizvođačima i distributerima koji stavljaju na tržište i čine dostupnim na tržištu upaljače suprotno odredbama ove Odluke, preduzimaju se mjere u skladu sa odredbama Zakona o nadzoru nad tržištem u Bosni i Hercegovini i Zakona o općoj sigurnosti proizvoda.

#### Član 9.

(Stupanje na snagu i primjena Odluke)

- (1) Ova Odluka stupa na snagu osmog dana od dana objavljivanja u "Službenom glasniku BiH".
- (2) Ova Odluka se primjenjuje nakon isteka roka od deset mjeseci od dana stupanja na snagu ove Odluke.

VM broj 57/16  
21. marta 2016. godine  
Sarajevo

Predsjedavajući  
Vijeća ministara BiH  
Dr. **Denis Zvizdić**, s. r.